

SAN JUDAS KARTA

Dxus pa'yanisawe'sxtxi Judas fxi'jni

¹ Jesukristo's selpisáa Jakobo nyakh Judas naa karta's fxi'jaçthu Dxus pa'yanisawe'sxtxi. I'kwe'sxa' Jesukristo jxpe'jni wala ew üsi'kwe. ² Txãasa Dxus peeygãani wêt yuuçxáa mfxi'zewe.

Ïsxiina fxiy kaapiya'jsa ùsta'

³ Kwe'sxtxi na'wě Dxus nwe'wek txã'sçxáana wejx áate kaapiya'jna fxi'jya'wath yu' i'kwe'sxtxi. Nawa txã'wě yūumée fxiy yu'kxpehwa'kh kaseh txã'sna wejx dud fxi'jaçthu i'kwe'sxtxi neewe'wena, na'wě Jesukristo's ũuste jxpa'gaçxa nwēese'jwa'ja's kaapiya'jni yuuk txã'sa' jxpa'gayã'jçxa', weh yuhwa yu'pthejkahmen. ⁴ Txã'wěme' maa nasaíi yu' ïsxiina fxiy kaapiya'jsa ũsyã'tha', nawa txã'wě yūusa' Dxus kastigo seena'te khēeya' u'jwa'jsata' jīna txāniitey pta'sxni yā'kh yu' Dxus libroute. Txāa nasa' wala kazx ewmeesata', txã'wěçxaíitx kwe'sxtxi taki'sa Dxusnawa weeçxna naa kiwete ewmeesa yuuçxáana kxtey yuuna fxi'ze'. Sa' kwe'sxtxi jxpe'jsa Jesukristonawa txã'wěytxi weeçxi'.

⁵ I'kwe'sxa' jiiyã'jne'kwe nawa ki' kaayaki'jya'wath na'wě yūuni's: Dxusa' Israelwe'sxtxi Egipto kiweju kutxi'jçxawa, maafí yuutxi's ivxiituk nwēese'pha'gamée.

⁶ Txã'wěy angeleswe'sxwa jxpa'yakxpa'gamée

txãawe'sx yujuni's nvxihttxi, açã' Dxusa' txãawe'sxtxi' preesu'jçxa ji'pha' çxhi'dx walate kastigãywa'j en ähtewe'sx. ⁷ Txã'wëy Sodoma Gomoçxa vxite' txãa ja'dasuwe'sx çxhabwa iiméh kazxsateçxáatx fxi'zena ũsu' peekx kakwe's suwsaçxáana nwëese'jna. Txã'wë kazx yũupa'ga bagaçxte yuhwa pçuwa'jmée ipx wala seena'te kastigãynitx yuu txãa angeleswe'sx na'wëy. Txã'wë kastigãynisa' kaajiyu'jsata' maawa txã'wëy yũukahmen.

⁸ Txã'wëtewa txãa nasa ïsxiisawe'sxa' ewmée yajkxna txãawe'sx kakwe's pkaltetx kaafxi'ze'je', sa' jxkaahsawe'sxtxiwa weeçxna wëesxuna Dxusnawa weeçxi'tx. ⁹ Angel npiičthë'j Migwel yuhwa txã'wë yu' wëesxumeea' Moises kakwe's eçxthë'j jxũna u'j wëjeçte, txãa yakh puutx we'wena ũsçxawa. Naasáa idxa's Dxus jiina jĩnaçxáak we'we. ¹⁰ Nawa txãa piçthë'j ïsxiisawe'sxa' jiimeeweete ewmeetx açewe'we'. Txãawe'sxa' tajkx na'wëçxáawa yajkxya' äjani yu'sa' txãawe'sx ivxiituwa'the iičxáatx kaaselpi'ji'.

¹¹ Kainwa ma'wëga yuu txã'wëyçxáa yũusaata' naa pa'ga txãawe'sxa' wala yuh nxuste pa'jwa'jsata'. Vxyu wala ji'phu wëeçxa Balaan na'wëytxi jxpuba. Sa' Koréwa ma'wëga ewmée açewe'wepa'ga uu txã'wëy vxitutxna. ¹² I'kwe'sx weçxana pkhaakhenisu kaythame'jya' pa'jsaçxáata'. Txãawe'sxa' kxsũ pa'jçxa thaamewa'ja's ji'phmeetx ũ'na tudxna fxi'ze', i'kwe'sx ksxavxyte thaamewa'jmée. Txãawe'sx ew fxi'zewa'jçxá'stxi yaaki' vxite yuutxi's peeygãhmée. Tãapha's wejxa mteewa jxũna

u'jnisa na'wěsaçxáata' seelpimeesa. Fxtũu tasx yũnsamée na'wēsata'. Txāa fxtũu tasxa'swa ma'wē peena yu' ye'çxkahnén petx weçe jxuka khubeni yuukx txā'wěsaçxáata'. ¹³ Mar weeswée seena' bu'çxisa na'wēt̄x yu' txāawe'sx ewmée thaampa' yũuni yakh. Estrelxa txajx u'jwa'j dxi'ja's jxpubasáa na'wēsata'. Bagaçxteçxáa yuhwa kasehwa'jmée ewmée seena' nxusnxus çxhi'dxte nvxiitni yuuwa'jsata'.

¹⁴⁻¹⁵ Adan nçun sietetewe'sx Enokha' na'jik Dxus kaaũusuthe'jni's: Txā'wē ewmée yũuni's jxukaysatx paapējxçxa nasa seena' ewmeesatxi's jxukaysatx kastigāyya' Dxusa' txajx nasa iiméh wala kuhsa yakh yuhte uythu, txāawe'sx makwethē'jne'ta ewmée yũuna fxi'zeçxa txā'wēy Dxusnawa açewe'we txāa pa'ga kastigāyya' jī'k Enokha'. ¹⁶ Nasa txā'wěsa' e'sga nuywe'wena fxi'zesaçxáata', sa' peekx kakwete wēt̄ fxi'zewa'ja'sçxáatx pakwe', txā'wē e'sga yu' açewe'weççxawa āate yu' ewçxáatx we'we', txāawe'stxi wa'lmée pu'çxkahn.

*Dxus yakh fxi'zesatx neewe'weni
jxpa'yakxkahn*

¹⁷ Nawa yakthē'jwe'sx miiyajxwe: Jesukristo jxkaahnisawe'sxa' nyafxíi pta'stxi na'jina: ¹⁸ Nmeh en yuuçte' nasa' pa'jatxna Dxus jxkaahni yu'sa' weeçxna txāawe'sx ũus yaakxni ewmeesaçxá's nwēese'jsawe'sx jīnatx we'we. ¹⁹ Txāawe'sx txā'wē nasatx kaapui'jsa yuutxna, txāawe'sx ũus yaakxni ewmeesa's nwēese'jsa, Dxus Espiritu yu's ũuste ji'phmeesa.

²⁰ Nawa yakhthē'jwe'sx, i'kwe'sxa' Jesukristo's ũuste jxpa'gaçxa nwēese'jwa'ja's kaapiya'jni yuuk txā'sa' jii yā'jçxa', txāajũ yu' peena kasehnuwe. Dxus Espiritu's jxpi'kxçxa, Dxus yakh mpuutxwe'wewe. ²¹ Dxus peeygāanijũ txutemée ũyhasna meswe, kwe'sx āhmeekwetewa Jesukristo peeygāhçxa bagaçxte yuhwa pçumée ĩtxi fxi'zewa'ja's ũswa'j en āhpkaçx.

²² Vxitewa jxpubawe'sxte ew mkaajiyu'jwe.

²³ Vxitetx peeygāhçxa menwe'wewe ipx walate khēeya' yā'j ũssatx. Nawa ewmeesa's jxpa'yakx. Txā'wēme' ropa yuhwa jxuka ewmeesaçxáa pēethenita'.

Dxusa's weçxana fxi'jni

²⁴⁻²⁵ Dxus kwe'sxtxi nwe'wesa txāa yuuçxáa kīhte yuhwa sxiigmée jxpe'jsa i'kwe'sx ewmeete wetekahmen ewte jxpe'jya' ājawa'jsa'. Txā'wē yūuçxa i'kwe'sxtxi kīh pkal yuhwa ji'phmée txajx weçxana ũsnite nuypa'jana. Txāa yuuçxáa jx-tuhthesa', maatewa jxthaakwe walasa, kīhtewa jxuka ājasa'. Txāa yuuçxáa jxkaahsa'. Sa' Dxus ũsnite i'kwe'sx pa'jya' ājakahn kwe'sxtxi jxpe'jsa Jesukristo' pu'çxhina. Nyafxiiteywa txā'wēk pu'çx na' āçxwa txā'wēy íiçxáa pu'çxhina, sa' bagaçxtewa pu'çxna nes yuuna.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd